

府谷縣鄉土志

貳卷

府谷縣志

耆舊錄

事業

隋龐晃字元顯周驃騎大將軍虬之子也周太祖時以大都督遷驃騎將軍襲爵北陽侯知文帝非常人深自結納與有射雉之驗及文帝踐祚加上開府進爵為公河朔王宏肇擊突厥晃以行軍總管出賀蘭山擊賊破之斬首千餘

級遷原州總管

詳見隋書本傳

唐折嗣倫祖華魏惠文帝十三代孫字文別緒其上代自李唐武德中任府谷鎮遏使中間或以忠烈著或以賢能顯其官與名惜無考證嗣祚唐末

為麟州刺史愛民如子時有趙宣子郭伋之譽

按嗣祚即嗣倫也舊志所傳為嗣倫而其墓碑則為嗣祚想後所更耳

五代折從阮初名從遠漢天福二年入朝避高祖諱更名從阮字可久嗣倫子

唐莊宗鎮太原時署牙將後以招回紇歸國領府州刺史晉開運元年以從阮為府州團練使初高祖割地賂契丹府州與焉會契丹欲盡徙河西之民以實遼東州人大恐從阮保險拒之及晉與契丹絕從阮引兵深入其境拔勝州下十餘寨故有是命後漢高祖於府州建永安軍以從阮為節度使至周末獨據府州控扼西北中國賴之明年以其族朝京師廣順三年慶州野雞族反遣

從阮討平之顯德二年卒其為人溫恭長者居父喪以孝聞

詳見五代史本傳

宋折德辰從阮子從阮鎮府州時署德辰為馬步軍都校廣順間周世宗建府州為永安軍以德辰為節度使時從阮鎮邠寧父子俱領節鎮時人樂之顯德中德辰率師攻下河市鎮入朝以其弟德願權總州軍時世宗南征還次通許橋德辰迎謁請還內地世宗以其素得蕃情不許厚加賜賚遣之德願又破并軍於沙谷峇斬其將郝章張釗顯德元年敗太原軍於城下擒其將楊璘子御勳御卿自有傳文一相傳稱折太君適保德人代州刺史楊業時號楊無敵太君性敏慧嘗佐業立戰功生子六今保德州北河神廟乃四將軍延昭號六郎者太宗朝以崇儀使知保州智勇善戰在邊二十年屢敗契丹延昭子文廣亦宋名將娶慕容氏善戰次延玉後業附潘美為武朔行營契丹入寇為美所迫戰於陳家谷自午至暮無救援墜馬被擒三日不食與其子延玉皆死之潘美王侁畏罪欲掩其事太君上疏辨夫力戰獲死之由有詔削二人爵除名為民今保德州南四十里折窩村有折太君墓見保德

嵐朔諸志

餘詳宋史本傳

折御勳字世隆德房子領邠州團練使擢知府州開寶二年太祖征太原謁於行在授永安軍留後兩從郊祀九年來朝擢秦寧軍節度使

折御卿御勳弟幼補節院使署本州兵馬都校歷開廐副使知府州太宗征河東與尹憲同攻嵐州下之又殺憲州刺史霍翊擒其將馬延忠等六獻於朝擢崇儀使凡四遷府州觀察使旋拜永安軍節度使至道元年契丹入寇其將韓德威誘黨項勒浪菟族自振德犯邊御卿引兵大敗之於子河汭斬首五千級獲馬千匹勒浪等乘亂反擊韓德威僅以身免殺突厥太尉司徒舍利等獲吐番首領一詔遣使嘉之歲餘會御卿病德威謀知之率眾來報斬馬步軍都軍頭孫贊於軍御卿力疾出戰德威聞其至不敢進其母密遣人召歸御卿曰世受國恩邊寇未滅御卿罪也臨敵棄士卒不可死於軍中乃其分也為白太夫人無念我忠孝豈能兩全言訖泣下翌日卒年三十八歲御卿知府州復宋所失州縣一十五處上聞悼惜久之贈侍中以其子惟正為洛苑使知州事惟正歸朝以其弟惟昌繼之

折惟昌知府州事咸平二年河西黃女族長蒙異保及惟昌所部毀訛引趙保吉之眾入寇麟州萬戶峪進至松花砦惟昌與從叔海超弟供奉官惟信率兵赴戰會保吉兵眾官軍不敵惟昌臂中流矢墜馬攝弓起得裨將馬突圍出海超及惟信沒焉九月保吉黨萬私保移埋復來寇惟昌與宋思恭劉文質合戰於埋并峰敗走之又破言泥族拔黃砦焚其器甲車帳俘斬甚眾以功領富

州刺史景德元年與王萬海等破賊若獲芻糧抵麟州秋入朔州界破狼水砦明年拜興州刺史大中祥符二年表求赴闕真宗命近臣與射於苑中宴賜甚厚上言先臣御卿蒙賜旗三千竿以壯軍容請別給賜許之七年命河東民運糧赴麟州當出為援惟昌力疾領步騎屯寧遠砦冒風沙行以疾卒年三十七

折惟忠字蓋臣惟昌弟初以兄惟信戰沒補西頭供奉官擢閤門祇候及惟昌卒以惟忠為六宅使知府州兼麟府路都檢母喪起復授雲麾將軍卒惟忠知兵事天聖中契丹與夏國會兵境上聲言嫁娶惟忠覘得其實率麾下往備之戒士卒毋輕動一夕風霾有騎走營中以為寇至惟忠堅臥不動徐命擒之得數逸馬蓋賊所縱也子繼宣嗣州事寶元中坐苛虐絀為左監門將軍擢其弟繼閔嗣州事

折繼閔字廣孝慶曆中元昊兵攻麟州不克進圍府州城險且堅東南有水門崖巒峭絕阻河賊緣崖腹微徑魚貫而前城中矢石亂下賊轉攻城北士卒復力戰賊死傷甚眾遂引去繼閔以城守勞特遷宮苑使自元昊反繼閔招輯歸業者三千餘戶皇祐二年卒以其弟繼祖嗣州事

折繼祖字應之由右侍禁遷西染院使莅官二十餘年奏乞書籍仁宗賜以九經韓絳發河東兵城囉兀繼祖為先鋒深入敵帳降部落八百加解州防禦使初繼祖欲解去州事下河東安撫使梁適體言折氏世龍衣此州比年監司一以條約繩之尤為煩密繼祖不自安故欲解去乞慰存之詔不許至是卒繼祖有子當龍衣州事請以授兄子克柔詔從之而進其三子官祿二孫為借職

折繼世繼祖弟少從軍為延州東路巡檢蒐名山內附繼世先知之遣其子克勤報種諤用是取綏州諤速繫獄以兵付之而行遂同名山守綏州錄功領忠州刺史說韓絳城囉兀以撫橫山因畫取河南之策絳以為然後以果州團練使卒折克行字遵道繼閔子初仕軍府無所知名種諤拒夏人以環慶詔河東出師為援克行請往諤使以兵三千護餉道戰於葭蘆州先登斬級四萬降戶千馬畜萬計諸老將稱為真折太尉子擢知府州討夏國克行與張世矩將河外軍抗章先驅即委管鑰而西大酋咩保吳良以萬騎來躡克行為後拒度賊半渡隘縱擊大敗之殺咩保吳良王中正出塞又先拔宥州折氏每出必勝夏人畏之蓋左廂兵專以當折氏太原孫覽議城葭蘆諸將多不合召克行問策即屯兵吐渾河約部伍為深入窮討之狀敵疑不敢動既訖役入津慶龍橫川斬級三千詔河東進築砦石通道廊延帥遣秦希甫來議欲由近及遠克行曰不然事有奇正今乘士氣之銳所利在速政當出其不意先築遠者若徐圖之士心怠矣卒用其策城果成又經略河右為金人所畏望見旌旗即驚避後侵涇

原克行大敗之克行在邊三十年善撫士卒戰功最多

墓碑作大小戰百七十過未嘗
表敗官高平郡開國公諡武恭

羌人呼為折家父官至秦州觀察使卒子可大為榮州團練使知州事

折可適克行從子未冠有勇騎射不習而能鄙延郭達見之歎曰真將種也

薦試廷中補殿侍隸延州從种諤出塞敵易其年少索與鬪斬其首取馬而

還自是益知名米脂之役與夏人戰三角嶺得級較多又敗之於蒲萄谷東

兵久不得食有千人闖於軍門或欲掩殺為功可適曰此以飢逃耳非叛也單馬出詰之

曰爾輩何不為父母妻子念而甘心為異域鬼耶皆回面聲諾謝再生各遣歸羌夏

人十萬人寇先令謀者訪其烽卒姓名詐為行視首領呼出盡斬之烽燧不傳

因卷甲疾趨大破之於尾丁磴回次柳楊溝正午駐營分騎據西山料敵必

躡其後率所部纔八千轉戰至高嶺迺從間道趨洪德設伏邀其歸路

敵至伏發衝之其國母踰山而遁焚棄輜重並帳帷首飾之屬眾相蹈籍

者如積論前後功至皇城使成州團練使知岷與蘭州并鎮戎軍渭帥章

案合熙秦慶三道築好水川副總兵王文振失道千人盡死歸罪可適折

宗貸其死削十三官案請留以責效乃以可適權第十二將令密圖夏首鬼名

阿埋昧勒都逋皆夏人桀黠用事者可適謀知二酋以畜牧為名會境上遣

兵星夜往襲併俘其族屬三千遂取天都山帝為御文德殿受賀以其

地為西安州遷東上閣使充涇原鈐轄知州事會鍾傳行邊為敵所隔可

適以輕騎拔之歸傳議同環慶出師取靈武帝以訪可適對曰得之易

守之難當先侵弱其地待我藩籬既固然後可圖帝是其言進武安軍

節度觀察留後步軍都虞侯城蕭關又與傳議齟齬傳因曠日覆師

劾可適貶鄭州觀察使俄知衛州拜淮康節度使與轉運使議不合中

以疑謗召為佑神觀察使踰年復知渭州卒年六十一子彥質

以上元傳俱本折
德辰傳并參

折彥質可適子金人犯城京師戒嚴彥質為府州帥與姚古种師中各

以兵勤王凡十餘萬人至汴城下而幹礪不已退李綱請詔古等進之三省

乃令護送出之勿輕動以啟釁時大臣政令矛盾故迄無成功欽宗靖康元

年以彥質為河北宣撫使金粘沒喝陷河東諸州郡彥質以兵十二萬拒之

夾河而軍師潰高宗紹興六年春二月以彥質簽書樞密院事十二

月張浚還自鎮江彥質與趙鼎請帝回蹕臨安與浚策相左鼎罷知

紹興府彥質亦尋罷未幾卒

王稟少貧至岢嵐謀生計有孟家翁見其材概軼常以女妻之後為太

原總管欽宗靖康元年九月金粘沒喝領軍十萬攻太原稟固守制禦賊

雲梯火梯鴛車等法甚精備終以眾寡不敵城陷奮銳力戰知不可為負太祖像死汾水中妻孟氏曰婦以夫為天夫死我豈有生理亦投水死

岢嵐州志

張岳字子雲天聖中西夏觀察使阿遇有子來歸阿遇寇麟州據邊戶約歸所據麟州還其子而阿遇背約安撫使遣岳詰問岳徑造帳中逆順以諭阿遇語屈留岳抽佩刀貫大纜啗岳岳引吻就食無所憚阿遇撫岳背曰真男子也翌日又與岳縱獵雙兔起馬前岳發兩矢連斃之阿遇驚服遺岳馬橐駝悉歸所酋州將還補來遠此若主時年十八名動一時從折繼閔破羅黃黨兒兩族斬偽軍主赦保累遷洛苑使前後解圍破寨擊賊陷陣數中流矢創發背間卒

詳見宋史本傳

朱昭字彥明以效用進累官秉義郎宣和末為振武城兵馬監押攝知城事金兵內侵夏人乘虛盡取河外振武距府州三百里最為孤絕昭率老幼嬰城敵攻之力昭甚驍銳千餘人為約曰賊知城中虛實有輕我心若出不意攻之可一鼓而潰乃夜絕兵出薄其營果驚亂城上鼓譟乘之殺獲甚眾夏人設木鵝梯衝以臨城晝夜進攻不止賊即悟兒思齊介胄來以羶盾自蔽邀昭計事昭常服登陴語之恩齋却盾而前數宋朝失信昭曰上皇知奸邪誤國改過不吝已行內禪今天子聖政一新汝獨未知耶乃取傳禪詔赦宣讀之眾愕服昭勇辨是時被圍已四日城多圯昭以智補禦勢不可復支召諸校謂曰城且破妻子不可為賊污幸先戕我家而背城死戰勝則東轡圖大功不勝則暴骨境內大丈夫一生事畢矣幼子戲階下遽起手刃之長子敬為視又殺之並屠其家人昇屍納井中將者妻孥者又皆盡殺之有陰與賊通者告之曰朱昭與其徒各殺其家今將出戰人雖少皆死士也賊大懼以利啗守兵得登城昭勒眾於通衢接戰自暮達旦屍填街不可行昭躍馬從城缺出墜塹中賊驩曰得朱將軍矣欲生致之昭瞑目仗劍無一敢前旋中矢死年四十六

金武都由進士遷高水令縣素多盜都皆廉得其名榜之通衢約無再犯悉奔他境遷中都轉運副使與弟御史郁以親老乞侍尋丁憂服除遷灤州刺史入為戶部郎中詔山海道漕遼東粟賑山東都高其價直募人入粟招海賈船致之累遷為戶部尚書中都戒嚴都如大興府醉以褻衣見詔使坐是解職起為刑部尚書河東路宣撫使以疾卒

詳見金史本傳

程震字威卿東勝州人與兄鼎俱擢第入仕有能聲興定初詔百官

舉縣令震得陳留治為第一召拜監察御史彈劾無所撓時皇子荆王為宰相家僮輩席勢侵民震以法劾之於是上責荆王杖大奴尤不法者數人臺綱大振以故小人側目未幾坐故吏訟罷官歲餘嘔血卒士論惜之

詳見金史本傳

元程思廉字介甫東勝州人給事裕宗潛邸以謹愿聞積官至河東山西廉防使累任風憲言事剴切不畏權貴不隨舊法凡遇病民者即請罷止改易如止有司歲饑徵租縱流民渡河求食請減餉諸王駝馬等事皆除苛去弊之舉尤好薦達人物卒諡敬肅

詳見元史本傳

明薩普整黃甫蘭家塢人洪武初舉人為人厚重有謀畧初隨軍為參謀有功授山西保德州知州保德當明創立之始城郭不完政教初興普整力加飭治煥有新色治績懋著至今州人猶能言

見保德州志

楊繼禮縣城人邑庠生家貧母病極力延醫醫言年老人需服補劑方全因割股密奉之病愈後母忽偵知嗚咽號涕鄉里始知其事撫道旌獎歲給米三石六斗食米三十餘年

戴辰孤山堡人其先直隸鳳陽籍以從太祖有功授正千戶直隸山西太原右衛後徙保德所尋又調陝西鎮羌世次承襲遂家孤山焉父冕以博士弟子員襲陞操守生辰狀貌魁梧抱忠仗義嘉靖戊午秋酋大侵延慶花馬池被圍其固原寧夏延綏三鎮帥亦分屯各困於清水營小鹽池曹豐阜墩

之間芻糗無備聲援不通延帥李輔者懼坐斃乃矯檄授辰辰見勢危入告父冕曰事棘矣大人幸無慮謂其妻趙曰無他囑惟翁老兒幼是念趙駭泣進曰君既以身許國勿更內顧憂遂環甲躍馬率所養士百餘人突重圍奮迅衝擊撒指退曰其撐犁神乎戰且馳抵豐阜墩下向延帥曰酋已蟻屯慎勿輕動迺奮勇戰直搗虜營破之一酋長恃悍驅驍騎迎鋒應弦墜殪酋益忿蜂擁身首被創猶更戮力血戰手斃賊頭投墩大呼曰惟堅壁俟援毋我慮吾誓死鋒鏑戰四十餘陣會日暮無援竟死之酋亦以疑畏去而花馬池圍遂解時年二十九贈明威將軍訃聞趙號泣痛絕者再匍匐走死所就殮輿歸欲自經念夫囑乃護柩羈旅磚井堡躬鍼績脫簪珥以盡仰事俯育之力且時恐翁悲傷務欲得其歡居二年前翁即世趙以一孤嫠百計勉圖扶二柩東歸間關千里而抵孤山營翁莫如禮寄夫柩於翠峰寺誓將同穴四壁蕭然益殮藥茹茶訓子甚力時將夫花馬池被圍血戰之節諳諳言之聲淚俱併聞者無不壯然揮涕曰真忠烈公婦也萬歷間表曰真節子延春自有傳

見高主事碑

張一元黃甫堡人素尚雄武同弟一貞充薊鎮總旗嘉靖四十二年十月丁

卯辛愛把都兒破墻子嶺同陣亡萬歷元年俱贈懷遠將軍

李夢桂縣城人由歲貢中嘉靖甲子科副榜初授直隸龍門通判以才敏稱陞四川劍州知州旋任江西饒王府左長史歷任十餘年致政歸憫套人不時入寇出貲於小南門外傍石巖鑿一洞額曰洪濟其洞之洪大可容千餘人邑人常避寇於此自嘉靖中以至國初王嘉引高有才等之亂活人不可數計闔邑德之請入鄉賢祠子繼志自有傳

戴延春號步泉以父辰蔭授保德所正千戶萬歷七年遷大柘油守備十八年遷入衛遊擊尋陞石塘嶺參將白馬關戰功叙第一陞副鎮總兵二十六年以平倭授都督僉事鎮守山東備倭總兵三十年授驃騎將軍誥封兩代鎮守孤山四十一年特起陽和軍門標下中軍延春勇猛絕人尤工於射兼文墨優裕凡遇邊情奏報一揮立就時稱馬上靈布父以忠死母以節顯一門賢孝於時罕匹子天寵武進士天職副總兵李繼志字繩叔夢桂子萬歷丁酉舉人除宿遷令山東飢民二千餘口入境皆設法賑濟全活之轉西河廳督船却木商常例數千金歷官兩淮運同子國璋國瑞國瑾

王好善縣城人邑庠生為人忠厚讀書不倦喜為義舉天啟五年北門外建觀音洞劉家川建石塔三座以補風水後因學宮魁星樓坍塌捐貲率邑人建立之以子繼謨貴歷追贈至光祿大夫

張立位密邨村人貌雄偉有智略崇禎初以民壯投曹文詔營充兵伍隨征有年無所建立及文詔追王嘉引至陽城賊勢甚眾不能取勝立位自言與嘉引有內親因密受文詔計詐投嘉引以其姊策誦約王國忠合力殺嘉引傳首報文詔於是驅兵進勦掩殺滅賊以功授左衛協副將初之任值套人犯邊立位引兵由殺虎口與套人戰以兵少深入為吉昂所困身中數創脇破腸出猶力戰賊引却未得大入立位遂以傷重卒事聞贈龍虎將軍祭葬有差

王國忠黃甫堡寬坪人小名埋根少不事生業有勇力以避亂走河曲勒受偽職詭從之及張立位詐降遂與合謀殺賊有功授蒲州協副將闖賊李自成破綏德奉檄進征過於碎金驛相持日久自成不能進知國忠勇不可敵遂設反間計有三原名妓一軸畫者素與國忠自成相狎識自成作亂首於營臨陳時自成不事攻殺和言歡語與國忠道及昔年相狎一軸畫及從王嘉引事言畢即引賊去國忠疑其有伏勒兵回而一軸畫已在營中矣國忠知賊詭計即手刃之出戰而自成先已四布

流言王國忠愛名妓一軸畫降闖王矣榆兵最忠義聞流言各鳥獸散
事聞削職國忠志甚並眷屬居於綏德之西山寺自成聞之令其子李
過引賊圍寺院說之曰吾意不重破綏德而重得將軍將軍能從吾
平天下富貴共之國忠曰賊等奸謀我生不能殺賊報國死尚得為清
白鬼肯從汝為賊耶李過怒磔殺之至死罵不絕口其妻女皆先自縊
寺內一家完節

賈夢周賈家寨人有勇力精騎射天啟時充密雲鎮標兵丁奮勇敢
戰陞右哨領旗屢出征著有勞績崇禎十三年密雲巡撫王繼謨以功
題陞陽河督標守備屯守宣府口賊潰口戰沒詔贈懷遠將軍

王繼旦字兼我好善三子由庠生以軍功授清水營守備陞火器營參
將崇禎十七年闖賊破城戰沒無嗣妻鄭氏削髮為尼改本宅為白不

翟應祥黃甫堡人少無賴有勇力所用鑄錮重五十餘觔工騎射發無
不中日遊市中鄉人多苦之應祥曰若輩日愁苦無歡狀得無憂盜
乎鄉人曰吾憂不在盜而在君也未幾以罪繫太原獄中直流賊四起俱
借應祥名所向虜掠官軍莫能禁應祥在獄中大言曰吾若出鼠輩
不足平也監者竒其言上其事得釋投軍大同為隨營校尉奮勇敢
戰所持鑄錮旋轉如風所向有功人稱為鑄錮大將軍崇禎時歷陞至
殺虎口副將卒於官

李國璋字經世繼志長子初為國學生有大志精騎射弱冠投筆
從軍崇禎九年以功陞至黃甫遊擊號令嚴明日勤操練兵民兩相
和輯毋敢有特伍侵陷事而仍與士卒同甘苦營中畏與感并繼
陞寧夏參將勦捕賊寇屢出有功卒贈驃騎將軍

李國瑞繼志次子以歲貢除張秋通判卓有政聲陞授永平府同
知以宿望擢戶部員外郎所司稅務俱身率群下無敢錙銖染
指商民為便繼差永平府司餉永民歡迎載道以為福星再臨皆
德之

徐光祚縣城人家貧父素有羸弱疾常需甘旨光祚竭力耕作供
奉豐裕父性暴輒唾罵繼以鞭撻皆婉容受之又祖母飲食起居極
意承歡無少懈鄉里稱至孝云

尤世威縣城人與兄世功弟世祿並以勇敢知名積官至總兵解組
歸值李自成陷西安傳檄榆林招降總兵官王定懼率所部精兵
棄城走城中士馬單弱布政使都任亟集副將惠顯參將劉廷傑

等與里居將帥議城守眾推世威為主帥守具未備而賊已抵城下
廷傑募死士乞師套部將至賊分兵却之攻城甚力官軍力戰殺賊
無算賊益眾來攻起飛樓迫城中矢石交至世威等戰益厲守七晝
夜賊乃穴城置火礮車轉之城遂破世威猶督眾巷戰婦人豎子亦登
屋瓦擊賊屍相枕藉既而力不支任死之賊怒廷傑勾套部磔之至
死罵不絕口世威等被執縛至西安自成坐秦王府欲降之不屈自成
曰諸公皆名將助我平天下取封侯可乎世威曰汝驛卒敢大言侮我
自成笑前解其縛世威唾曰驛卒無近前污將軍衣自成怒皆殺之
詳見明史本傳邑傳世威妾賀氏於前明滄海殉難時忽口生鬚須逃匿李家
洞一小洞內削髮為尼其處名曰賀家樓歿即瘞洞旁今尚有塚存

尤世祿字定宇世威弟由武進士歷官至甯夏總兵凡七任總戎晉秩
少師頗好文學天啟三年兵部孫承宗出鎮調王世欽及世祿分南北
二部尋定分地馬世龍居中駐衛城世欽南海世祿北山並受世龍節
制三月適化永平遷安灤州失守閏五月而城始復論功祖大壽最世
祿次之滿桂與崇煥城築甯遠屹然成重鎮蒙古部駐牧其間遼民
來歸者悉遭劫掠四年二月承宗遣世祿龍襲之大凌河諸部號哭西

竄東鄙以甯五年給事中郭興治請令廷臣議去留論冒餉者復踵至
有詔以簡將汰兵清餉三事責承宗世祿及世欽等罷言官論世龍
不已至九月有柳河之敗七年五月大清兵圍錦州分畧甯遠桂遣兵
救被圍叅籬山桂與世祿赴之大戰相當遂入甯遠城與崇煥為守
御計前大清兵進薄城下桂率副將尤世威等出城迎頗有殺傷以
捷聞崇禎三年承宗議先取灤五月十日祖大壽等先抵灤城下世祿
與吳自勉等繼至越二日克之四年同曹文詔等破賊河曲有功六年春
與賀人龍同復遼州後里居與世威同殉難同時死者有山海參將
尤岱岱守水西門城陷自殺子捷官薊鎮總兵甲申京城陷率兵奔河
南圖興復集錄明史馬世龍按延安府志職官尤世祿侯世祿並載有傳又
有總兵侯拱極而傳僅列尤世祿一人其子拱極所列俱侯世祿侯拱極
事省志同譚志人物名宦傳又祇列侯世祿拱極而無尤世祿明史侯
世祿及子拱極專傳尤世祿附載世威傳中又尤氏家藏追薦簿

世祿係世威兄並附記之以俟考

尤翟文字龍潭世威從弟定邊副將勇敢善戰臨敵不事刁斗賊
素知其名嘗從洪承疇曹變蛟追闖王高迎祥與戰鳳翔官并斬

首七百級闖賊攻榆林城時翟文與世威保德州知州鍾乾健等同守翟文守南門出力戰於榆陽橋歿於陣

尤世功世威兄亦說世威從弟萬歷中武舉歷官至總兵天啟元年三月我大清以重兵薄瀋陽同賀世賢掘塹濬壕樹大木為柵列楯車火器木石環城設兵守法甚具世賢勇而輕嗜酒戰敗揮鐵鞭馳突圍中擊殺數人中矢墜馬死世功引兵援亦戰死贈少保左都督增世蔭三級再蔭指揮僉事世襲賜祭莫建祠諡曰愍忠

詳見明史本傳

王繼謨字顯我號純穆好善長子萬歷丁酉拔貢中已酉舉人庚戌進士授河南南陽知縣歷官至密雲巡撫總督山西宣天陽和等處軍務秉性剛毅勤賊有功居官清慎人稱其德密雲立祠祀之初兵科給事中方士亮以才力不及劾罷之後又言恐代繼謨者未必能勝繼謨得留任崇禎十六年因闖賊變防守沿河一帶十七年闖賊至繼謨與巡撫衛景瑗檄大同總兵姜瓖扼之河上瓖凡故昌平總兵姜瑄勸瓖降賊瓖因潛納款而還景瑗請節事見明史繼謨曰事已去矣徒死不足以報國不如棄去保守京師為重大遂由甯武抵京與闖賊戰歿子存育存肅

王繼烈字承我好善次子由邑庠生以軍功授榆林衛錦衣千戶在任清廉仁慈軍民感其恩常贈以萬人衣傘居鄉以忠厚待人喜施濟邑人稱為二活佛子存恪存怡存敬

蘭光元黃甫堡人少精幹有勇力膽畧過人初隨陽和總督王繼謨以兵丁中崇禎時武舉效力陽和勤賊有功補督標守備屢戰奮勇爭先所向皆捷陞至江南金陵副總兵愛兵如子軍中有挾纊之歌崇禎十六年以病歸卒於家

劉鴻聲字作林鎮羌堡人祖籍延安臨城明世襲百戶指揮麻營至高家堡遊擊善撫軍士懋著輯甯之效致仕後好施與嚴家訓為鄉黨矜式年七十卒著有愛菊園詩集兵燹後遺稿盡失

蘇萬元縣城人字澤我由貢生任杭州府經歷以廉能擢餘杭知縣崇禎間予告在籍王嘉引陷城入其室賊黨郝太率眾劫之使從逆萬元唾罵賊知志不可奪乃縛之以索貲萬元瞪目叱曰吾為朝廷一廉吏未嘗作賊安得貲有亦安能媚賊耶賊怒細索堂室間掘地無所獲乃交刺仆地萬元益罵不止言畢氣絕城中方亂其子呈書年未冠經營數晝夜具一柳棺殮焉萬元目不少瞑顏色如生其氣凜凜然若欲起立

殺賊者三院旌匾曰兩間正氣

高運馨高家灣人年少多才尚氣節素有重望其父高奇英先為孝感知縣遭王嘉引之變賊以運馨為宦家後人望所歸勒使降且索財運馨曰吾清白家子能為狗輩污耶賊以刃劫之不少屈復大罵曰鼠賊敢以若刀辱吾頸挺身投水死賊驚視其弟生員運熙復大罵奮擊為賊所害三院旌匾曰芳聲不泯從祀鄉賢祠

王用汝紅泥寨人年十八補博士弟子有志節居縣城王嘉引陷城賊勒用汝受偽職令守城用汝不屈夜踰城出賊覺追之至東門外方臺山之西投於深崖下死而復甦若有神助逃至紅泥寨居住賊敗三院旌匾曰義可回天

清朝

王存恪繼烈子好讀書有文學為邑廩生高逆有才據城以存恪素有重名欲降以為眾望存恪不屈強之存恪曰吾力不能誅汝當以頸血濺汝也與弟廩生存怡俱遇害

蘭芳仁黃甫堡人前明守備民附子以兵丁隨征有功授火器營千總年二十餘有謀畧敢戰明鼎革棄職歸家不求仕進順治五年值高逆有才變前哨及府谷閩縣驚惶知芳仁有謀畧請於知縣劉宏達約禦賊以救生靈芳仁慨然赴縣知兵弱不能敵賊素善用火礮於南西兩門內暗伏火礮用詐降計引賊入門擊之有才知芳仁在城內未戰請降疑有詐遂於趙家石窰紮營使前哨分道入城將入門火礮齊發擊賊死者甚眾有才怒悉眾由北門攻入索芳仁急芳仁見事敗遂自盡於學宮前孫家拐角賊志甚殘其屍終未獲葬妻朱氏有殊色芳仁死遺子三俱幼堡中舊有兵備副使察院其家丁聞氏美謀娶之有利氏產者暗受其聘朱聞知將三子并家產托族人忠厚者裙內藏利刃及期家丁至朱乃散髮破碗自披其額血流滿面抽刀刺之家丁走避事解朱復恐有謀者遂棄堡中業攜三子家於鄉外躬自耕食撫育子成立年八十二卒前明進士孫奕煥於康熙十三年叙入蘭氏族譜以詩歌有守節維婦盡忠維夫之句

王國揚寬坪寨人生而英敏不凡個儻負志節年十七遊黌序有學能文國初為選拔第一任福建省縣丞耿逆之變賊素知國揚有文學誘之降授以偽職國揚不屈復以威劫之國揚曰汝身受朝廷異數之榮不思仰報反欲謀叛豈惟不忠莫立於天地且祇有顯誅徒自求禍而已

取笑曰迂儒閉之一室絕粒不食死賊服其義諭國揚從人斂其屍及事平始扶柩歸

韓登瀛木瓜堡人幼穎敏喜讀書比長篤於孝絕跡公門為邑人所推重順治八年以恩貢除河南開封府新鄭縣知縣勞心撫字用法廉平時值吳逆之變鄭邑路當孔道使者絡繹不絕差役煩苦捐俸協濟至傾家貲以舒民困二載餘以年老抱疾告歸去之日鄭邑士民攀轅塞道泣挽不忍舍去後猶尸祝之卒年七十

傅維新馮家滙人居家孝友有學行以歲貢初任清源縣縣丞清慎奉職勤於政治清邑舊有白石溝水患維新設法築堤以障之士民稱便陞秦王府審理廳年六十告休優游林下時與族黨相歡集成咸稱有二疏風

劉鵬聲字程元鴻聲弟少凜孝義之行喜讀書咸目為遠到器國初以軍功由千總陞鎮羌堡守備多將才營伍嚴肅常曰國家設兵原以衛民民害不能備奚以兵為每臨敵身先士卒斬獲甚多夷人稱為劉大力後邊方寧謐即於本堡無諍菴中捐俸延師設立義學多成材遇歉歲即自捐貲倡本堡設實之家以周貧乏全活者甚眾年甫壯以勞瘁卒於官遂家堡焉遺子之翰年九齡妻孟氏苦節撫孤成立入庠年八九無疾卒後堡官杜肇升以節壽可風追恤其門

杜肇升延安籍文煥之後康熙丁未武進士初任江南安慶衛守備以將才調鎮羌堡守備遂家焉甚撫恤兵丁間有兵民相爭必委婉勸釋民亦貼然服教樂其無私庇多著善政操練之暇喜讀書吟咏著有馬上吟詩草沒後堡人立石以志頌戴文煥與其父桐明史各有本傳

杜武勳肇升長子身材雄偉少有大志年十八為黉廩生後念先世多以武功顯遂投筆從戎果以軍功歷官至雲南鶴麗鎮標中營遊擊手部伍肅然為一鎮最又通達大體在鎮與子廣仁家書云你今入武庠此項頭巾最是累人若不讀書考在劣等就羞辱祖宗不可對妻子且武學好考若不研究策論熟習弓馬止終老頭巾亦成錢鎖子耳適值軍興旁午以勞瘁卒於官奉照陣亡烈贈恤靈柩回堡

王錄紅泥寨人為邑諸生有大志工騎射嘗曰吾輩豈屑屑以毛椎子作生活耶因投筆充行伍雍正七年隨川陝總制岳西征有功陞廣武營把總為前哨與遊擊段景賢進攻哈密寇數萬圍困錄奮勇突圍出所向無前及出圍不見景賢復殺入亂軍中尋覓身中數

鎗卧於地馬失錄復奪賊馬乘之親隨家丁板定亦驍勇令護持於後奮勇殺賊賊少却與景賢潰圍出所部士卒皆得全活論功第一景賢請以遊擊讓錄錄不受兵總制深義之陞廣武營千總與守備守西卡其卡為巴里坤咽喉錄至相其地形曰斯卡為賊所必爭須有重兵以守之因嚴加防守賊果夜引兵數千劫營錄所部僅百餘人或有勸其棄營走者錄曰是卡為大營所關若失賊得長驅大進堅守以待救兵賊晝夜急攻五日守禦備至士卒皆傷卧錄素得士心奮臂一呼士卒皆強立火藥鉛彈羽鏃皆盡營破守備中流矢死錄身中數鎗猶力戰死時年三十歲平明大軍至則營已破矣事聞詔贈武畧將軍賜祭葬銀四百金以千總蔭一子後以子天歿蔭除馮允中少名登閣清水怪人少曠達大度有膽畧不事產業未得志常走套中深習梵語依叔家度日後自念非久大計欲赴榆充兵夜半穿叔鞋走叔覺追至一樹下見一黑虎驚退允中曰俟兒立功疆場當以錦衣償叔叔曰吾為兒出無資斧故追送耳允中不顧去至榆營以軍功授把總歷至四川冕山營守備坐川陝總制岳公帳下事岳公以事覆大將軍年公深加究詰籌楚備至允中力陳其無他後年公諒其忠實且知允

中習梵語善韜畧帶征青海至一處求水泉不得人馬渴甚突有黃羊數百允中與從人羊血可飲急射之進未數里得一大冰淀兼可導後軍飲咸稱天朝有神助也夷人畏懼投降年帥諭允中宣揚天威問答如流遂投誠奉旨率青海夷人引見路過縣川往返間鄉里有迎謁者允中曰王命在身未敢款叙鄉情人以為肅敬有細柳營風以功陞陝西火器營參將尋陞漢中營副將轉雲南聞化湖廣襄陽兩鎮總兵至四川城都提督後奉旨轉以提督管西大同總兵事西大同係新設人皆以餉為生允中至廉慎供職撫兵如子德感三軍咸頌曰馮佛爺其後寄籍城都多顯仕有中川省文榜者以地遠未得其詳王國泰紅泥寨人美姿儀工騎射年十七補邑博士弟子嘗讀唐人詩至寧為百夫長勝作一書生句慨然曰是吾志也因棄學生隨父秉璽任至四川清河營充兵丁中康熙辛卯四川兵舉初任運糧河干總以勤慎轉運有功陞湖廣荊州衛守備然性廉直與當事不合坐事參世祖憲皇帝素知其概特詔陞見得白授荊州遊擊未之任卒於京

王翰京國泰弟貌雄偉有勇力工射居鄉時人以枝香著火深夜插

於百步外翰京射皆破的兼善彈雀有止者遙見翰京影即哀鳴飛去以武生中康熙乙酉武舉初任洛川千總歷嚮水堡守備陞廣武營遊擊雍正七年從岳大將軍西征進兵哈密撫士卒如子奉軍令守要卡兼管駝隻生畜賊數千夜犯營劫駝隻翰京率所部接戰殺賊無算賊引退勇冠諸軍後賊聞有駱駝王大老爺名者即遁去以功陞固原參將雍正十三年凱歸陞見陞洮泯協副將洮泯口土司恭翰京至任推誠締信約束有條土司咸感服乾隆元年駐防赤金會有疾卒於官洮泯人咸稱頌之

郝有譽字飛英孤山南莊人明末從父避兵寄居河曲城中年十六補博士弟子員食廩餼有河邑商黃天德者素與有譽父善因病昏夜持千金至曰吾死子幼且不才恐無以承家業此所積金祈藏君家俟兒能成立時予之否則君自用之可也有譽父仍避嫌同天德密瘞之牀下未幾有譽父亦病且死呼有譽語之故後天德子長果不檢隆冬襦帶新有譽呼之曰汝非我父執黃某之子乎何一寒至此因贈十餘金以徐觀其成久之黃果能自新以金營謀生理有譽曰是可以金還矣呼而語之同啟藏無有有譽惶然失措呈之河令徐公既同者曰若欲匿則勿言今言之是謹誌父言孝且義也親詣瘞金處具香案拜祝掘至牀前地中得原金畀之黃再四欲分半與有譽有譽厲色却之不獲已止受前所贈之十餘金河令徐高其義給匾旌之

劉旺縣川人康熙十四年值周逆之變挺身突圍出城渡河迎請大兵區賴以安全

張海宇縣川人家頗殷實樂善好施康熙十七年歲饑餓斃甚眾海宇濟粟數百石多所全活

以上三傳見省志

王璞黃甫堡人父永昌性謹厚母周氏嚴於內治生璞兄弟四人璞長玨次之璞性純良篤於孝友樂善好施遇人急周之其主家政不私妻子御諸姪並諸姪孫如己出年八十三舉鄉飲耆賓璞卒其弟玨代理家政悉遵璞舊制勤儉敦厚苦心四十年堡人有以爭產訟者眾輒邀玨至其家皆報服和解年八十一舉鄉飲耆賓璞兄弟生業偉等十一人業偉居長性最孝故事諸父友于昆弟以力學成乾隆丙寅歲貢玨卒繼玨理家政者亦守璞玨家規親愛之情洽於骨肉業偉等生大觀等十四人大觀入武洋繼業偉治家不失先人風大觀等生廩生凌雲

等十五人生齒日多而修行力學勤農貿易各有專營自璞父永昌及其曾孫凌雲歷五世前邑令劉旌其匾曰五世同居

蘇藩字潮聲縣川人少孤有執性家貧至身并日一食竭力奉繼母郭甘旨不絕又曲體郭意弟妹婚嫁俱設措從豐且不欲令郭知侍郭病衣不解帶者三月郭死奠縣西北八里之後河川花塢山陽廬墓三年墓前祖地數畝躬耕奉祭墓距水遠哀號年餘忽掘地得泉誠動鬼神呼為孝子并且待郭出二弟至有人所不能堪者益加和怡修祖塋讓祖產多隱德焉乾隆三十年旌表建坊入祠子天秀天寵

李誼黃甫堡人少儻有大志力學未成性樂好施篤於孝友黃甫口監邊千總李一桂之仲子雍正七年進兵巴里坤一桂從征會疾篤不能行誼願以身代告諸當事者許之從征八年卧雪荷戈無少懈怠凱旋後放志林泉遇戚族以恩有鬻產者誼出貲取贖以還不求償有族弟李蒙家甚貧撫養成入與之婚嫁蒙子一女蒙卒仍撫之如已出鄉人咸高其義邑令歐陽悉其事舉鄉飲耆賓

王秉鐔字穆菴繼烈孫歲貢生性寬厚嘗以藥施濟精治外科不受人貲咸稱為善人公舉鄉飲大賓四次

鄧志敏黃甫堡人字健菴有膂力精騎射年十六入武學屢科不售退就農居平謹慎自持而喜為義舉乾隆二十三年因堡中義學脩儀不足將所置地三十餘垧半價售入義學以備費用堡東有大纏坡者山陝通衢也甚長且陡每暑月冬雪苦無暫憩所志敏於東西坡界山巔創立關帝廟一楹茶房二間廟夫一人附近置地十數垧俾有養膳兼施茶水濟往來行人三十四年縣學宮東西廡年久坍塌志敏呈稟請捐銀二百兩身自督工重為整新尤篤於宗族凡子姪有困乏者常為周濟遇孤寡加意撫恤未嘗少有德色年六十五卒死之日鄉黨中咸為悲慟子二松庠生恒出繼急光緒初黃甫駐紮統領金運昌於大纏梁陵修建廟宇房舍煥然一新即志敏所創之舊也

蘇鵬縣川人由監生考授縣丞職後以年老未就選性最孝事母楊勤顧養迫於家計遠方服賈常具方物省候兄弟間亦極友于至老無間言多隱德南關偏臨黃河恒苦水患鵬於前後輸建兩橋鄰族間有急者輒周恤無德色有爭訟務委曲解勸人服其公正妻楊氏亦極孝盡婦道凡處妯娌待僕下俱和慈有賢聲鄉里籍必藉稱之

王安禮尖堡民人胞兄安順寄居河曲地方耕種度日後兄子死遺妻楊氏同享

媳等仍外居安禮念寡嫂無依迎至家歲助粟十餘石以充給食用俾撫養姪
孫成立乾隆三十四年邑侯鄭給匾示勸

以上諸傳俱沿舊志間有增入者於其
傳後詳明所本如折可存及二張傳是也

蘇蘭第字香楣祭之堂叔其沂之高第也素有大志讀書習舉業視等輩
蔑如也性揮霍蕩產傾家不少惜以故落魄離鄉流寓京邸發奮自勤
道光癸巳成進士任湖北通山知縣勞心撫字而緩於催科遇有民欠輒作已
徵報銷不計出納一以恩接下惠養民而廉俸有數虧空日增竟坐是免官
與民有相戀不舍者焉蘭第非有司才用之失當乃致一蹶不起惜哉

王汝翼字明甫黃浦人歲貢生品行端方學裕工書法與黃浦遊擊榮光友
善同治七年亂相約死守堡城閏四月初聞賊入境光詣河曲請兵付空城於
汝翼甫過河而賊已至城陷汝翼遇害再賊去光歸抱屍而哭之曰幽冥之
中負此良友事聞恤贈世襲雲騎尉

吳士英黃浦人武庠生勇毅勤幹有膽畧多權術同治七年之亂堡人推
為團長守天成寨士英區畫詳慎防禦嚴密賊至有被礮擊斃者因之
不敢近寨避難人得以保全者甚眾且時出寨巡察遇有匪徒奸細即以軍
法從事堡人戴德與同事增生祁九功立雙義碑以誌不忘云

王萬煦字誦堂縣城人咸豐甲寅恩貢性慈祥寡嗜慾不輕言笑有學
行友于情篤接下多恩鄉里咸敬重之同治七年之亂邑侯彭會楫委辦
城防事務萬煦盡力籌畫因年老過勞卒於事邑侯旌匾曰勤勞
王家

吳道南字子衢縣城人邑庠生自幼耳聾心慧好讀書悟道最早家
素清貧兼學岐黃術頗有得賣藥不計債療疾不索謝是以屢空
且間有不舉火之時而坦然自若不為憂子懋寅承寅俱勤學食廩
餼乃年未強仕又相繼卒遺諸孫尚幼家益落道南不以境累心安貧

樂道有顏子簞瓢陋巷風士林咸傾慕之死之日同學代買棺殮葬焉
柴立本字道村柴家塢人少聰穎力學能文弱冠即見賞於馬邑侯疏道
光丁酉拔貢朝考以知縣用分發河南歷任靈寶延津太康等縣多政聲
尋有張翰思蕙意即告歸甫離任所而賊入河南拔陷永城歸德諸處

說者謂有見機之明自歸籍後凡地方義舉一切興利除弊便民事無
不極意成全如採訪死節請恤立祠以奠忠魂親詣軍門定章派草以免擾
累與夫捐義穀修文廟種種急公之務更僕難數蓋果於任事不避嫌
怨而見義勇為者也

府人

王萬協字中甫號竹園萬煦弟同治庚午帶補丁卯舉人性孝友穎敏有操持見書輒解雖值窮乏一介不苟蹭蹬名場以防城功候補教諭年近艾始捷秋圍六十有一歲卒平生曾未經心家務惟於地方公事不便於民者極力代除有裨者必贊成之光緒四年春人相食而催草比豆追呼日迫鄉下不堪其苦萬協乃與文生祁九功等上控免除一半以舒民困秋童觀察兆蓉因私開黑界來縣查勘萬協與有年誼從中調停罰捐蒙漢義穀二千餘石後十八年二十六年之荒賴以全活者甚眾

學問

晉劉殷字長盛勝州人七歲喪父事曾祖母王氏至孝冥感有盛冬禱澤生董掘籬下得賜粟諸異子七人五子各授一經一子授太史公一子授漢書一門之內七業俱興北州之學殷門為盛趙王倫篡位孫秀夙重殷名以散騎常侍徵之殷逃奔雁門齊王固輔政辟為大司馬軍諮祭酒轉拜新興太守明刑旌善甚有政能詳見晉書按晉書載殷新興人廣輿記曰勝州人考晉五原雲中屬并州新興郡而勝州則隋開皇二十年始置晉無此名意勝州本屬小地名五原治隸并州新興郡曰新興者從統屬言之曰勝州者從本地專言之耳如明末勇節尤世威世祿皆府谷城內人而省志延綏志俱載榆林人亦祇據統屬處而言是一明證也

清朝

李國瑾字玉衡繼志三子崇禎己卯舉人順治丙戌副進士由賓州學正陞國子監典籍貧不能買書日取國學經史板摩娑讀之手爪盡黑久而淹貫為秦中名儒時豫省宋牧仲輩皆重之嘗居佛寺日為炊俸米一飯冬無火與一老僕共披敝裘而坐其貧窮有如此者仍不失其操守終大理司務子日芳號雲根歲貢生考授訓道守未任

王國麟寬坪寨人少穎異有大志家貧力學中順治庚子舉人任長安教諭充四川同考官所取皆蜀中名士其學識為當事所欽重兩署安知縣清勤供職革弊興利民皆德之卒於任

王顯榮紅泥寨人有學力屢科不售以歲貢任岐山訓道守勤於課訓士風丕振陞鞏昌府教授以務本敦行為勸誘時士之從遊者皆知篤實

行卒於任

見岐山志

楊溥字天如楊家川口寨人垂髫時雅以聖賢自期孝友篤至及入泮習舉業屢科不售遂絕意仕進留心理學至寢食俱廢久之深有所得設教於村兩河從遊者甚眾以敦行孝弟為先務而學以成之一時所就如王翰岳

楊文藻王傑等皆為積學力行之士溥素有威重寡言笑人無敢慢鄉里有爭搆者輒欲祈公評爭者曰寔息勿令楊公知也其見重於人如此以歲貢授訓導未仕卒

王傑紅泥寨人少好讀書慕楊溥學行負笈從遊家貧新水不給日食夜燃柴苦讀弱冠補博士弟子食廩餼屢科舉不售以歲貢除咸甯縣訓導未仕卒

蘇雅字秀雙縣城人訓導守莖之子生而靈異丰姿秀美少有文名年十二應縣試第一名以母憂未院試後又第一名補博士弟子員食廩餼苦志讀書肄業長安書院為閩中名士孝友篤至不苟言笑與人交推誠信不為崖異院試第一乾隆十二年邑侯官會同儒學劉以學行超眾舉報優生癸酉為選拔貢雅自習舉業時即留心經濟品行端方邑侯李延署課子從無一言及地方事有問者概曰不知識者謂苟得大用以盡其才必當有著見者年甫四十卒

高登陞字觀宸高家灣人少孤貧至食糠粃事母至孝力奉甘旨勤問學成進士分發山西歷知清源翼城文水太谷諸縣稱廉介任清源令邑故多健訟登陞發奸摘伏人服其明敏訟亦漸稀有永濟渠者二村人爭水輒哨聚數百人釀成命案且有豪強把持已經歷任未結登陞親至渠踏驗擒其為首者五人重加責罰將渠立一值日轉流牌戒不得恃強侵霸人亦憚其嚴明終任無異詞邑地狹民貧舊有久客不歸其婦窮無仰贍准具狀改適夫歸無辭登陞驗狀曰此敗風俗而壞人心不小也此輩失節不過為飢寒而寡廉鮮恥至是因出示曉諭如有夫外出果係窮無仰贍者著里甲開報設法撫養且曉以大義令其守貞於是閨門爭厲節操而清邑夫婦多有保全者兩入省闈分校所取士皆一時名宿在任九年以疾歸清邑士女流涕送者塞道為立遺愛碑

蘇德水稿

楊敷字念齋縣川人性謹敏勤學問雍正乙卯拔貢入太學當就職以母病不赴舉成進士補宗人府教習期滿授浙江新城縣知縣在任十二年以疾告歸卒著有學山遺稿御史趙佑曰世之州縣起家者甫下車呼吏問倉穀出入幾何備公幾何稅若干額商賈若干戶斯民休戚弗及也以是給上官奔走之需不四五年調繁號能吏敷廉介樸直新城糧戶疲玩前令下鄉躬催民多擾敷罷之革鹽商茶價陋規建文閣於城之黃山招諸生講課城久淤捐俸督堰以時修濬溉田百

頃歲飢平糶外復捐俸倡紳士助賑上官有賢之者有嫌且忌之者求以事中之去而不可得久亦知其賢而意弗屬也凡六充鄉試同考官皆苦心校閱號得人京師浙士大夫咸惜尚未竟其用子廷權館學

士趙侍御實政紀

楊業字宋勳縣城人性穎異六歲就外傳過目成誦人以神童目之年十八舉於鄉成進士以文名同榜稱為楊無敵任山東泰安府東阿縣知縣東阿為九省通衢差務絡繹業辦理無一遺誤乾隆二十二年山東大水依山湖南望湖之水漲溢山岸一片汪洋業將依山湖之水挑長河疏之使達於黃河南望湖之水設法疏瀹引入大河口使注於海兩湖俱不在東阿境上憲因其勤敏故多委之協辦焉惜帑愛民民皆樂為之役而趨事恐後故同事者之工將半而東阿之工已告竣矣有蝗蝻入東阿境自斃民因是益奇而愛之伐石頌德後授漢中教授漢中郡守素知業學裕品端聘為漢南書院兼訓多士業一秉白鹿洞規條漢中士風丕振俸滿後道府皆欲保舉令復膺民社業以病辭卒於家年五十四

劉爾順字子貞縣城人舉人無邪之孫清水縣訓導銓之次子年十四隨父任讀書甫四月父歿爾順哀毀骨立清邑紳士感其哀誠各厚致賻儀扶柩歸籍兄繼歿遺子四歲家計愈貧爾順撫姪如子養教成立舌耕四十餘載出門下者甚夥後遭母喪晝夜哀號三年喪內未嘗啟齒亦未嘗一入房幃人稱為劉殷之嗣年五十七始生一子湧皆以為孝心所感鄉里矜重舉大賓三次選授甯夏府學訓導守課士勤謹文風丕振如進士張圯輩胥出其門下年七十五卒任所爾順為人忠厚沈靜立已接物深有宋儒風範邑中無小無大皆稱為劉先生蘇穀字公雙縣城人平涼府華亭縣訓導菁菁之子年六歲母亡事繼母劉盡孝養劉卒家雖清貧一切奠祭如禮在庠時嚴氣正性朋儕有過輒面折之莫不心服鄉里矜式公舉大賓二次選授沔縣訓導甫莅任見學署荒涼即有志修葺後積俸百金悉捐修理學宮煥然一新沔縣令賈惠曲陽曲進士重穀廉介訓課勤敏令三子就學受業俸滿告歸年七十一又四年卒

王廷聘字賁山寬坪寨人邑廩生幼失怙恃依祖母天性孝友好讀書有大志年十七補博士弟子員家素貧力學不倦伯時通久器重之及時通以武榜眼任大同營大廳攜廷聘至署受業於江南姚竹節先

生甫一載學大進姚曰邊方文學可從此蔚起矣會時通疾卒於官家無私積廷聘設法昇柩旋里葬焉邑人重其文行爭以子弟相受學訓讀外常以力行孝友為諸生勸所得脩金每以周窘急有堂弟繼曾時通子家貧外出遺妻丁氏年甫十八子思誠未週歲狼狽無依廷聘延之家與同炊思誠長為之婚配兼課以學旋入泮又有堂叔少亡遺妻翟氏子三人俱幼亦延養於家課其子廷式入學年六十以疾卒廷聘素嚴正為人所敬憚每宴會語曰貢山在座使人不樂謝世數月產一遺腹子名申保人以為積德所感云以上俱沿舊志採錄之

蘇其沂字魯源號篋和縣川人嘉慶庚申舉人從學於閻廷琳資秉少絀而嗜學異常忘食忘寢面壁以冥索者嘗屢日一旦豁然有悟曰道在斯矣於是文思大進凡所傳習多有心得廷琳嘗曰其沂之魯參之魯也廷琳歿繼講席者難其人因延請焉其沂本所得廷琳新傳以為後學津梁隨事誘掖語焉必詳山西鄰境之士亦多負笈來學經其指授皆克有成當時謂廷琳之道其沂傳之云

閻煜閣號穀峯廷琳子恩貢生詩禮親承不尚口耳章句之學潛心苦讀務得真詮學問深純品重鄉里公請主講榮河書院以為多士矜式煜閣性謹恪行端表正遵先人遺規訓課講解語必盡其精詳戒矜張不輕許可務使學歸有用邑人稱之謂父博於文子約以禮蓋前後媿美云

閻道行字子英縣城人道光癸酉舉人同治壬戌成進士以知縣用籤掣福建未仕年七十有三以講席終道行幼聰慧見書輒解為文不事雕琢而絲絲入彀殆天授焉由是學富養優地方爭委贄以矜式多士長榮河書院未久又長神木之文興書院並長保德之蓮峰等書院道行亦以成裁後進為已任勤啟迪善誘道行兩河人士多所造就其籤掣福建也部文屢催到省諸生不舍婉諷之謂殷深源以出而喪名文中子以不遇見重道行遂絕意進取而蓮峯一席三十年成隱逸所矣其墓之日門弟子立遺教匾曰望重山斗

蘇樞字子長縣城人歲貢生有式之子同治乙丑恩貢幼聰穎有式口講手畫以教之勤問學善屬文氣機筆力頗近退之未弱冠已成文壇巨擘李觀察義裁均評其文謂在黌宮稱老宿則有餘入名場取科第則不足故屢科不售竟以明經終同治間狃匪犯境時邑侯郎鶴鳴因樞素有老將軍之譽使督練鎗手五十名帶領防城樞亦設謀

盡智嚴為守禦賊退保獎以教諭本班儘先用尋長榮河書院發
奮振興而兵燹後復見人文蔚起榭亦與有力焉年七十有六卒於家
楊翼孫字小峯嘉德子也同治癸酉舉人光緒丙子成進士任鳳翔府
教授卒於官翼孫性中和勿積學優裕涵養純粹有望儼即溫之度
與弟舉人振孫俱以文名著怡怡相處友于甚篤家窶貧舌耕糊
口當狃匪犯境時避亂居城無學館惡歲及硯田有日一餐夜寄宿
之苦而勤學不輟洵所謂憂道不憂貧者歟李觀察義均蔡太守
兆槐深器重之亂平弟兄相繼取科第振孫以強仕時卒翼孫司鐸
西鳳勤於訓課加意培植副學常際盛經其指授亦領鄉薦計莅任
十年所成就者甚眾子琛珩皆克負乘恂恂有儒士風

中華民國



十三年三月

日